

DEO OPTIMO MAX.

QUÆSTIO MEDICA,

QUOD LIBETARIIS DISPUTATIONIBUS
manè discutienda in Scholis Medicorum, die Jovis duodecimo mensis
Decembris, Anno Domini M. DCC. XLVIII.

M. JOANNE-JACOBO MESSENCE,
Doctore Medico, Præside.

An in somno perspirationis imminutio?

I.



UI per cutis poros perpetuò excernitur humor, insensilis perspirationis nomen sibi vindicat. Huic materiam præbent, tum fluidorum, tum, quæ quotidie deteruntur, solidorum, excrementitiæ partes, quæ, si diutius in corpore detinerentur, exitiosa ederent dissidia. Tanta est hujus evacuationis quantitas, ut brevè vires fatiscerent, nisi alimentis in nostram conversis substantiam, deperditum repararetur. Cæteras excretiones simul sumptas longè exsuperat perspiratio: ita ut ex octo libris assumptorum, teste (a) Sanctorio, ad quinque libras assurgat. In definiendâ tamen hujus quantitate, variæ cœli corporumque temperiei, habenda ratio. Si non turbetur, & æquabiliter fiat hæc excretio, perfectissima est sanitas. Quoties vel aucta, vel imminuta, ab hâc viâ deflectit, toties morbus imminet. Multas ratione quantitatis subit diversitates. *Quantitas perspirationis*, inquit (b) Sanctorius, *aliquam varietatem patitur, pro varietate nature, regionis, temporis, ætatis, morborum, ciborum, & aliarum rerum non naturalium. Statim (c) à pastu, & diu post eum minima; intra horam quintam à pastu & duodecimam maxima.* Huic etiam mutationem inferunt somnus & vigilia. Ob variam in utroque statu corporis dispositionem, multæ functiones diversimodè peraguntur. In somno feriantur organa sensuum tum externorum, tum internorum, imò in iis, sicuti in instrumentis motuum voluntariorum, adest inhabilitas ad munia sua obeunda. In vigiliâ verò, vividè agunt, & officia sua perfectè adimplent. Ex functionibus naturalibus, quædam tardius in somno quàm in vigilia perficiuntur, debilitantur aliæ; imminui enim, saltem quæ glandularum ope fiunt secretiones, omnes Medici consentiunt. An autem increscit, vel decrescit perspiratio? Solus ille quæstionis nodum solvet, qui rationem quâ somni tempore munus suum absolvant organa vitalia, sedulò perpenderit. Quò enim validior, vel debilior sanguinis circuitus, major minorve corporis calor, eò uberior parciorve perspiratio.

(a) Sanctor.
sect. 1 aph. vi.

(b) Idem. sect.
1. aphor. vii.

(c) Boerhaav.
inst. med.

II.

CUM liquida è sanguinis alveo depromantur omnia, humorum secretionum quantitas, cæteris paribus, ex circulationis vi deducenda. Quò enim major sanguinis copia ad organum secernens deferretur, eò copiosior fiet secretio. Sanguine autem velociùs acto, minori tempore æqualis, vel æquali tempore, major ad organum appellit sanguinis quantitas; uberior indè fieri debet secretio, modò tamen in ipsomet organo nihil obsteat obicis. Quod quidem, de omnibus secretionibus verum, meliori adhuc jure perspirationi competit. Cum enim fiat hæc secretio per vasa exhalantia, ipsismet arteriis continua, minimâ in cursu sanguinis mutatione factâ, mutari debet & ipsa perspiratio. Quotidianâ observa-

(a) Sanctior.
sect. VII. aph. I
2. 24. 25.

(b) Idem. aph.
I. 15.

(c) Aphor.
xlviii.

tione constat, ab iis quibus intenditur, vel remittit sanguinis velocitas, augeri vel imminui perspirationem. Sic inter animi affectus, quidam, ut ira, & pericharia, (a) eam promovent, dum alii, ut mœror & tristitia, ei moram inferunt (b). Hoc autem ab immutatâ circulatione tantum oritur, ut rectè annoravit Sanctorius. (c) *Latitia diastolem & systolem efficit faciliores, mœror verò & mœstia, difficiliores.*

Verum non expulsioni modò sed præparationi etiàm materiæ perspirabilis conducit sanguinis circuitus. Magnam sanè exigit partium divisionem perspiramentum insensile, Quò majori velocitate fertur sanguis, eò rectius hanc tenuitatem adipiscuntur humores. Dum enim velocius movetur, actio fluidorum in solida, solidorum in fluida reactio, augentur; pretiosus ille attenuatur, subigitur latex. Hinc dum simul adest in fibris robur, maximi attritus fiunt, calor increscit, humores optimè dividuntur, & facillimè excrementitii per cutis poros eliminantur. Contrà verò, lentius moto sanguine, imminuitur actio solidorum in fluida, minores attritus fiunt, præsertim si simul adsit relaxatio; calor decrescit, spissescunt humores & ad liberam exhalationem ineptiores evadunt. His liquet, cur ii quibus robustior est corporis compages, quibus ideò validior circulatio, calor intensior, magis perspirent quàm debiles & laxi homines, quibus hæc omnia defunt. Sic in viris quàm in fœminis uberior perspiratio. Sic etiam, docente (d) Sanctorio. *Robustus ciborum plenitudinem absumit perspiratione, minus robustus urinâ, debilis denique corruptione.* Quantitas ergò perspirationis, à motu sanguinis & calore corporis derivanda. Hos autem in somno decrescere, cuilibet vel leviter attendenti mox patebit.

(d) Sect. III.
aph. xiv.

III.

CIRCUITUM sanguinis, plurimum fovēt & adjuvant musculorum actio, partium tonus & elater. Motus muscularis & tonicæ actionis efficaciam, demonstrant partes paralyticæ, quæ brevi tempore, præ circulationis decremento, pabulo suo defraudatæ, contrahuntur, arescant, exsiccantur. Huic etiàm valdè favet solidorum elater. Hinc in partibus majori elasticitate donatis, ut musculis, tendinibus, citatior sanguinei laticis motus; dum per partes molles minùsque renitentes, ut pinguedinem, ipsius impetus multum infringitur. Ex his, intellectu facillima motus sanguinis in vigiliâ & somno diversitas. In vigiliâ enim, musculari vigente motu, conquassantur vasa: sanguis à contractis musculis repellitur; celeriori recursum ad cor delatus, ejusdem motum stimulat. Eadem ratione uberius ad pulmones affluit; undè citatior respiratio. Vividius suum obeunt munus organa vitalia; attenuantur, comminuuntur humores, copiosioreque perspirationis materiam suppeditant. Etenim observante (a) Sanctorio, *Exercitio corpora leviora fiunt, omnes quippè partes præcipuè musculi & ligamenta, motu ab excrementis purgantur; perspirabile ad exhalationem præparatur, & spiritus tenuiores fiunt.* Hinc etiàm rectè monet idem (b) Sanctorius, perspirationem ubi in sanis deficit, exercitio sarciri. In somno verò, deficiente motu musculari, multò segnius movetur sanguis.

(a) Sect. v.
aph. ix.

(b) Aph. xxxiv.

Nec sola hæc est diversitatis ratio. Sanguis per vasa capillaria, satis expeditus traduci nequit, nisi contractioni cordis adjutrix accesserit actio tonica. Hæc præditæ partes in vigiliâ, motu oscillatorio gaudent, quo humorum, alioquin hærentium, per tenuissima vascula urgetur motus, fitque perfecta vasorum meabilitas. Hæc actione prætereà, contriti, subacti humores, ad perspirationem fiunt idonei magis. At dormientem intueamur hominem. Quàm collapsa membra! Quanta mollities in iisdem & flacciditas! Geminum hujus relaxationis habere principium. Depauperatur spirituum à cerebro influxus, emanans proinde è nervis fibrarum tonus labefactatur; tensione in vigiliâ prius protractâ, revocabilis, actio propemodum perit elastica. Collabuntur, torpescunt solida; cordis lan-

guescit motus, fitque tardior sanguinis cursus. Pulsus, fateor, arteriarum major & plenior est; laxiora sunt explicari vasa fibrarum tonus, sunt & elater immixtus. Mollior est; lentius eadem molliusque in sanguinem reagunt vasa. Respiratio profundior esse potest, quia uti rariores undæ sanguinis ad pulmones affluunt, ita majores esse par est. Hæc autem rarior est; ex quo simul & ex laxâ in somno pulmonum compage, sequitur minori impetu in pulmones pelli, iisque expelli sanguinem. Minus ergo rite peraguntur functiones vitales. Cui quidem opinioni haud parum favet observatio Rydlei. Vidit ille (c) vir omnes nervos involuntarios, organis scilicet vitalibus & naturalibus prospicientes, quasdam accepisse à cerebro fibras. Cum ergo in somno ob defectum influxus à cerebro, parcius deriventur spiritus ad organa vitalia; in his imminui debent, quæ à spirituum copia scaturiunt, vires.

(c) Vid. Hallet. instit. med. de Somno, §. 10.

I V.

SA T I S superque probatâ velocitatis sanguinis in somno imminutione, quis caloris decrementum in dubium sanus revocaverit? Calorem corporis, attritui sanguinis in vasorum parietes, attritui pariter molecularum inter se deberi, consensu omnes fatentur unanimi. Relaxatis porro partibus solidis, debiliores fiunt sanguinem inter & vasa attritus. Ex tarditate circulationis, minor exurgit particularum sanguinis attritio, minor globulorum in se invicem actio: undè calor remittit. Hoc indicat ratio, probant experimenta. Certum enim est dormientem insigniter frigere, si fuerit non magis quam in vigiliâ (a) tectus. Calor tamen æquabilis similis incubantis gallinæ in somno per totum corpus diffunditur; ita ut qui pedibus friget, capite calet, nunquam dormiat, quin prius pedes inteperint (b); omnia vasa æquali celeritate perfluuntur; hinc rectè fit, etsi tardior, assimilatio. Cutis ut plurimum in somno benè tecta, calorem acquisitum apprimè servans, ipsius incrementum in toto corpore minus oculatis designare poterit; sed nunquam, rem paulò altius investiganti fucum faciet. Circulationis, & caloris decrementum, satis adhuc comprobatur observatio (c) Sanctorii. *In dormientibus, stragulis detectis, magis impeditur perspiratio, quam in vigilantibus, vestibus nudatis.* Ex his omnibus abundè patet perspirationis in somno imminutio. Quod quidem effectum ab observationibus confirmatur. Experimentis accuratissime institutis detexit (d) Gorterius, duas circiter, intra horam somni, perspirationis uncias secerni, in vigiliâ tres, & cum exercitio quatuor. Referente Keilio (e), *perspiratio diurna, nocturna sesqui altera est.* Sive naturam somni, sive quæ ipsi succedunt phænomena perscrutemur, omnia cum hac sententiâ rectè congruunt. Post somnum fiunt oscitationes, pandiculationes, artuum extensiones. Ob imminutam in somno circulationem, moram trahunt, stagnant fluida. Horum ope motuum circuitus sanguinis per pulmones restituitur, eidem intrâ musculos harenti stimulus incutitur; & præterea horum ea est efficacia, teste (f) Sanctorio, ut dum viget, corpora horæ dimidiæ spatio magis perspirent, quam tribus horis alterius temporis. Iis ergo excitantur & reviviscunt circulatio & perspiratio. Hæc omnia confirmant, quæ post nimium somnum se se exerunt, symptomata, ut caput grave, sensus hebes, &c. *Per nimium somnum, ait Sanctorius (g), exteriora & interiora frigescunt, humores impinguntur, redduntur imperspirabiles, & corpora ponderosiora fiunt.*

(a) De Gorter de perspirat. n. cccviii. cccxvi.

(b) Boerhaav. inst. med.

(c) Sanctori. sect. iv. aph. lxi.

(d) De Gorter. cap. ii. §. 111. n. cccviii.

(e) Keil. Med. Stat. Britann. aph. xi.

(f) Sect. iv. aph. xxxiv.

(g) Sect. iv. aph. xi.

V.

MIRUM profectò, tot & tantis rationum momentis demonstratam, recentiorumque experimentis confirmatam sententiam, plurimos hætenus expertam fuisse impugnatores. Reverà undenàm major, somni tempore, organorum vitalium vis? Quid, quæso, robustiorem arguit respirationem? An, qui plerum-

que in dormientibus se se prodit, stertor? Minimè sanè. Nàm à relaxatione & muci in viâ aëreâ congestionem dependet; aër nempè per mucum aggestum sibi condens iter, relaxatumque in palatinum arietans velum, sonis injucundis, stertori scilicet, præbet originem. Verùm, urges, cuncta nedum minorem, imò copiosorem in somno indicant perspirationem. Imminutis nimirum aliis secretionibus, redundat in sanguine materia perspirabilis. A calore blando, æquabili, ad insensibilem exhalationem requisita tenuitas humoribus optimè conciliarur. Horum denique expulsionem multum favet cutis pororum relaxatio; id insuper observatione constat. Duplò magis, notante Sanctorio, dormiens vigilante perspirat. Hæc etsi primâ facie, adversâ militare tibi videntur argumenta, facilè tamen convelli possunt. Paucis ausculta. Quæ cæteras secretiones, eadem & perspirationem immittit causa, languidior nempè circularis motus. Hinc exurgit caloris decrementum, minùs debita humorum elaboratio, parcior præparatorum expulsio. Cuticularium mitte meatuum relaxationem in medium afferre; his si quidem constrictis, non parciore observatur perspiratio. Hyemali tempore, in Bataviâ, unciarum 16, Æstate 14, perspiratio nocturna (a). In hominibus suprâ glaciem motis, uberrima hæc excretio (b). Nec te moveat Sanctorii autoritas, qui in supputatione quantitatis deceptus fuit. Hujus lapsus si velis detegere, ingesta cum excretis conferas. Si enim, ut asserit Sanctorius, ad 50 uncias, vel 5 libras posset assurgere perspiratio nocturna (c), deductâ cæterarum evacuationum summâ, parcissima vel nulla foret, vigiliæ tempore, perspiratio; cùm tamen, qui hæc omnia tam appositè in Sanctorium congestit, Gorterus (d), invenerit *horis matutinis singulis corpus tres imò quatuor uncias perspirare*. Quæ quidem observatio novum in Sanctorio exhibet erroris fontem. Hic enim, non nisi post evigilationem, in se ipso experimenta instituere consuetus, partem matutinæ perspirationis, nocturnæ promiscuam adjungebat. Cæterum hanc cæna plenior, hanc stragulorum pondus uberiores facit. Quorsum hæc, effectus à naturâ somni oriundos unice trutinanti? Quid, postulo, concludere vetat?

(a) De Gorter. cap. 11. de perspirat. quantit. §. 111.

(b) Boerhaav. inst. med.

(c) Aph. 270. de gorter.

(d) Vid. de Gort. n. cccvii.

Ergò in somno perspirationis imminutio.

DOMINI DOCTORES DISPUTATURI.

M. Petrus-Augustus Adet.

M. Carolus - Franciscus Theroulde de Toulouse de Vallon, Eques.

M. Tuffanus-Gilbertus Boulland Consiliarius Medicus Regis ordinarius in ejus Castellato.

M. Jacobus Barbeau du Bourg.

M. Anna Carolus Lorry.

M. Gaspardus Cochon du Puy, Regis Consiliarius, & in Arce maritimâ Rupisfortensi Anatomæ & Chirurgiæ Professor Regius.

M. Joannes-Jacobus Messince, Aclûs Præses.

M. Joannes Jacobus Pelleteste,

M. Jacobus-Albertus Hazon.

Proponebat Parisiis, ANNA-CLAUDIUS DORIGNY, Parisinus, Saluberrimæ Facultatis Medicinæ Parisiensis Baccalaureus, A. R. S. H. 1748, à sextâ ad meridiem.

Typis QUILLAU, Universitatis & Facultatis Medicinæ Typographi, 1748.